

Fred Wijenberg kier ta cu su famia

Hefe di management team di KIA a entrega retiro

ORANJESTAD — Despues di tres aña turbulento como presidente di management team di KIA, Fred Wijenberg a entrega su retiro. E ta bay keda den su funcion te dia 1 di december pa asina guia su sucesor, e ta declara na Bon Dia Aruba. Motibo principal di Wijenberg su retiro ta uno personal. E kier disfruta di su pensioen y dedica su tempo cu su familia na Hulanda.

Normalmente no ta tende hopi di Fred Wijenberg. Como presidente di management team di e prizon di KIA, casi semper e tabata referi na minister di Husticia pa duna de-



claracion. Pero ayera e hefe di KIA tabata hopi franco y habri den su declaracionnan tocante su retiro. “Mi ta bay disfruta di mi pensioen. Mi tin yiu y nietonan. Cuminsamento di otro aña mi ta bay bek Hulanda y eyan mi ta bay tum’e un tiki mas trankilo y duna mas atencion na mi familia.”

E hefe di management team di KIA ta muestra particularmente riba hecho cu na februario proximo su yiu muhe mas jong ta bay haya un yiu. “Mi kier ta eyan pa esey. Mi yiunan no tin mama mas, y

ami ta e unico mayor cu nan a resta. Anto tur e tempo aki mi a keda leu. Pues ami kier bay bek y duna nan e atencion ey.”

Bon relacion cu minister y colega

Wijenberg su retiro ta pa motibonan personal pues, aunke cu e ta bisa tambe cu e trabou di e ultimo tres añanan tabata basta pisa. “E ta un di e luganan mas dificil pa traha y e ta tuma hopi di bo energia. p’esey tambe mi kier tuma un paso patras y bay mas trankilo.” E ta desmenti categoricamente cu su motibo pa retira lo tin di haber

cu conflictonan entre e cu su colega Dick van Leenen y cu minister Arthur Dowers di Husticia. “Cu minister Dowers mi relacion semper tabata hopi bon”, e ta declara. Dick van Leenen - cu segun Wijenberg a bis’e cu e lo bay sinti su falta - ta bay keda, contrario na rumornan cu tabata circula. “E tin entre otro e team di K-9 cu ta keda bou di su encargo.”

‘Wardadonan merece elogio’

Wijenberg tambe ta desmenti e rumor cu e lo a entrega su retiro pa via di e situacion den cual un grupo di bewaker ta wordo investiga pa maltrato pisa recientemente di un preso. “Hende ta papia tur tipo di cos.

Aworaki y pa un rato caba situacion bou di personal ta trankilo. Mi tin hopi respet pa e hendenan cu ta traha akinan, keremi. Pasobra si bo ta bewaker, ora bo haci bon niun hende no ta tende nada, pero ora algo bay fout e ora bo ta mira storianan teribel den corant.

Mi ta haya cu mayoria di trahadonan ta haci tremendamente nan best y ta merece di haya elogio. p’esey tambe mi ta sinti un tiki cu pasobra mi ta retira, mi ta lagando nan na caya pero mi tin cu pone cos den balansa y mi familia ta yama mi.”

No tur cos ta perfecto
Naturalmente cos no ta per-

fecto den KIA, pero e cos ta tambe cu esaki no ta un scol of un cas di anciano of un hospital. Bo tin di haber cu detenidonan y esey ta haci cu e ta keda algo dificil”, segun Wijenberg. “Pero sanger nobo semper ta bon y mi ta keda yuda minister den haya un bon reemplasante.”

E wardado di Span Ospino

Un otro ehempel di wardado di preso cu a cay den luz negativo ta e caso recien di presunto relacion sexual entre un wardado femenino y e conocido detenido Johannes Span Ospino.

Segun Wijenberg e wardado ta inocente. Nos a haya artefactonan den cel pero absolutamente nada ta muestra cu e acusacionnan ta berdad y cu mester disciplina e trahado. Sinembargo storia aki a plama, causando daño na e persona aki”, segun Wijenberg. “Di unda e tipo di storianan aki ta bin mi no sa. Por ta e ta keda un parti di cultura di e isla aki, locual mi ta lamenta.”

Vacatura

Wijenberg a entrega su retiro diabierna ultimo na minister di Husticia Arthur Dowers. “E ta bay en busca di un director nobo cu ami ta bay ‘werk in’ trankilamente pa asina pasa mando na dje na un bon manera y despues bandona e isla”, asina Wijenberg ta declara. E hefe di management team ta bisa cu

e mes no ta sigur si berdad lo bay tin un continuacion di e management team despues di su retiro of cu lo sigui cu un director fiho. “Loke mi a haya di compronde si ta cu nan ta bezig awo ta hincando un vacatura den otro”, segun Wijenberg.

Den edicion di vespertino Amigoe di ayera sinembargo, minister Dowers ta declara cu e intencion ta pa busca un director. Peter de Witte, comisario di polis saliente na St. Maarten lo a muestra interes y a haya invitacion tambe pa solicita, pero e preferencia di gobierno lo keda pa busca un director di procedencia local.

‘Mester ta integro’

E hefe of director nobo di KIA lo tin mester di un cuero diki, Wijenberg ta bisa hariendo. “Pero mas importante ta cu e mester ta integro. Bo mester ta honesto cu bo mes y cu otro. Ami semper a bisa mi hendenan akinan cu ami no ta wak nan color di wowo, pero puramente na hecho y circunstancianan.

Si tin un situacion den cua ta bisa cu tal trahado ta corrupto, nos ta haci investigacion y mi ta papia cu e persona. Si mi no tin prueba, e ora e persona no ta corrupto.

Como director bo mester conoce e reglanan bon y para fuerte den bo sapatonan. Pasobra bo ta haya bo mes ta trata cu hopi situacion. □